

MEMORANDWM CYDSYNIAD OFFERYN STATUDOL

Gorchymyn Cyrff Cyhoeddus (Diddymu Bwyd o Brydain) 2014

1. Gosodir y Memorandwm Cydsyniad Offeryn Statudol hwn o dan Reol Sefydlog ("RhS") 30A.2. Mae RhS 30A yn rhagnodi bod rhaid gosod Memorandwm Cydsyniad Offeryn Statudol ac y ceir cyflwyno Cynnig Cydsyniad Offeryn Statudol gerbron Cynulliad Cenedlaethol Cymru ("y Cynulliad") os bydd Offeryn Statudol y DU yn gwneud darpariaeth, mewn perthynas â Chymru, sy'n diwygio'r deddfwriaeth sylfaenol o fewn cymhwysedd deddfwriaethol y Cynulliad .
2. Gosodwyd Gorchymyn Cyrff Cyhoeddus (Diddymu Bwyd o Brydain) 2014 gerbron y Senedd ar 6 Mai 2014 a gerbron y Cynulliad ar 9 Mai 2014. Gellir gweld y gorchymyn yn:

<http://www.legislation.gov.uk/ukdsi/2014/9780111114599>

3. Mae adran 9(6) o Ddeddf Cyrff Cyhoeddus 2011 yn gwneud yn ofynnol cael cydsyniad y Cynulliad mewn amgylchiadau pan fo Gorchymyn a wnaed o dan adrannau 1 i 5 o'r Ddeddf honno yn gwneud darpariaeth a fyddai o fewn cymhwysedd deddfwriaethol y Cynulliad pe bai wedi ei chynnwys mewn Deddf y Cynulliad.

Crynodeb o'r Gorchymyn a'i amcan

4. Amcan y Gorchymyn yw diddymu'r cyngor a elwir Bwyd o Brydain (BoB), a sefydlwyd gan adran 1 o Ddeddf Marchnata Amaethyddol 1983. Yn syml, mae'r Gorchymyn hwn yn diddymu Deddf Marchnata Amaethyddol 1983 ac yn diddymu BoB yn gyfreithiol.
5. Mae'r Gorchymyn yn ymestyn i Gymru, Lloegr, Yr Alban a Gogledd Iwerddon.

Y ddarpariaeth sydd i'w gwneud gan Orchymyn Cyrff Cyhoeddus (Diddymu Bwyd o Brydain) 2014 y gofynnir am gydsyniad ar ei chyfer

6. Mae erthygl 2 o'r Gorchymyn drafft yn diddymu'r cyngor a elwir "Food from Britain" ac a sefydlwyd gan adran 1 o Ddeddf Marchnata Amaethyddol 1983. Mae'n darparu hefyd ar gyfer trosglwyddo eiddo, hawliau a rhwymedigaethau'r cyngor i'r Ysgrifennydd Gwladol dros yr Amgylchedd, Bwyd a Materion Gwledig.
7. Mae erthygl 3 o'r Gorchymyn drafft yn darparu bod rhaid i'r Ysgrifennydd Gwladol baratoi adroddiad ar yr hyn wnaed o ran cyflawni swyddogaethau BoB rhwng 1 Ebrill 2013 a'r dyddiad y'i diddymir. Bydd rhaid i'r Ysgrifennydd

Gwladol baratoi datganiad o gyfrifon ar gyfer BoB am y cyfnod hwnnw, a chyflwyno'r datganiad wedyn i'r Rheolwr ac Archwilydd Cyffredinol. Bydd rhaid i'r Rheolwr ac Archwilydd Cyffredinol archwilio, ardystio a rhoi adroddiad ar y datganiad o gyfrifon ac anfon copi o'r datganiad ardystiedig at Weinidogion Cymru. Bydd rhaid i Weinidogion Cymru osod y ddau adroddiad gerbron Cynulliad Cenedlaethol Cymru.

8. Mae erthygl 4 a'r Atodlen i'r Gorchymyn yn diddymu Deddf Marchnata Amaethyddol 1983 yn ei chyfanrwydd a hefyd yn gwneud diwygiadau canlyniadol angenrheidiol, sef dileu cyfeiriadau at y Ddeddf honno ac at Fwyd o Brydain, sy'n digwydd mewn deddfwriaeth arall.
9. Ym marn Llywodraeth Cymru, mae darpariaethau Gorchymyn Cyrff Cyhoeddus (Diddymu Bwyd o Brydain) yn dod o fewn cymhwysedd deddfwriaethol Cynulliad Cenedlaethol Cymru o dan Ran 1 o Atodlen 7 i Ddeddf Llywodraeth Cymru 2006 mewn perthynas â phynciau a restrir o dan 1 (amaethyddiaeth, coedwigaeth, anifeiliaid, planhigion a datblygu gwledig), 4, (datblygu economaidd) ac 8 (bwyd).

Pam y mae'n briodol i'r Gorchymyn wneud y ddarpariaeth hon

10. Mae Llywodraeth Cymru o'r farn ei bod yn briodol defnyddio cyfrwng deddfwriaethol sengl ar gyfer diddymu Bwyd o Brydain. Corff oedd Bwyd o Brydain a berthynai i'r DU gyfan; a'r ffordd fwyaf effeithlon o'i ddiddymu yn y pedair gwlad yr un pryd fydd defnyddio gorchymyn sengl. Er bod gan Lywodraeth Cymru a'r Cynulliad y pwerau sydd eu hangen i'w ddiddymu yng Nghymru, y ffordd sy'n ymddangos fwyaf ymarferol a chymesur yw defnyddio'r Gorchymyn hwn i gyflawni'r diddymiad yng Nghymru, Lloegr, Yr Alban a Gogledd Iwerddon.
11. Corff marw yw BoB, ac ni fu'n weithredol ers 2009. Nid oes ganddo staff, mangre, asedau na rhwymedigaethau. Cyflawnir ei swyddogaethau blaenorol bellach gan adrannau eraill o'r llywodraeth a chyrrff o fyd diwydiant. Unig effaith y Gorchymyn hwn fydd diddymu BoB o fewn y gyfraith. Ni fydd y ddiddymiad yn effeithio ar fusnes, a bydd yn sicrhau arbedion i drethdalwyr. Ystyrir bod Deddf Cyrff Cyhoeddus 2011 yn gyfrwng priodol ac effeithiol ar gyfer diddymu BoB.
12. Tra bydd y Ddeddf Marchnata Amaethyddol yn parhau mewn grym, bydd DEFRA dan ddyletsydd i gyhoeddi Adroddiad Blynyddol a Chyfrifon ar gyfer BoB ac i'w gosod gerbron pob un o Lywodraethau'r DU bob blwyddyn. Er nad oes gweithgarwch i adrodd arno, mae hyn yn achosi cost i DEFRA o tua £5,000 y flwyddyn am baratoi, archwilio ac argraffu'r adroddiad. Bydd diddymu'r Ddeddf Marchnata Amaethyddol yn dileu'r gost ddiangen hon i'r trethdalwr.

Y goblygiadau ariannol

13. Nid fydd unrhyw oblygiadau ariannol o ganlyniad i ddiddymu Bwyd o Brydain. Nid oes gan Bwyd o Brydain unrhyw staff, a cham gweinyddol yn unig yw ei ddiddymu, gyda'r nod o leihau nifer y cyrff cyhoeddus afraid.

Alun Davies AM
Y Gweinidog Cyfoeth Naturiol a Bwyd
Mai 2014